




EDITOR:
Bonaire Communication Services N.V.

Djarsars 31 yanüari 2023 | Preis:\$1.00

HOPI BULADÓ DI TRANKÉ

Donashon pa Walk for the Roses



Fin di siman a tuma lugá Walk for the Roses. Entre tantu a ekspandé esaki ku swim, ride i sail for the roses. Sekretario di Estado pa Asuntunan di Reino i Digitalisashon, van Huffelen tambe e partisipá. Na nòmber di ministerio di asuntunan interno i relashon nan di Reino, el a hasi un donashon di 5 mil dòler na e fundashon.



Diferente empresa a optené Sertifikashon Blue Destination

KRALENDIJK--Villa Carina Apartments, Fundashon Mariadal, AB Dive i Greenbikes a risibí sertifikashon den kuadro di Blue Destination. Djáron 25 di yanüari Kámara di Komèrsio i Industria Boneiru huntu ku diputado Hennyson Thielman di desaroyo ekonómiko, BONHATA i TCB a bishitá e empresanan akí pa hasi entrega di nan sertifikado di Blue Destination. Kámara di Komèrsio kordialmente ta felisitá e kuater organisashonnan akí ku e éksito ku nan a optené i ta ekspresá e speransa ku nan lo ta un ehèmpel pa otro empresanan.

Villa Carina Apartments a logra e máksimo di sinku

strea. E risòrt na Belnem for di aña 2020 tabata sertifiká kaba ku tres strea, loke e tempu ei tabata e kantidat máksimo ku por a optené. For di aña 2022 a amplia e programa di sertifikashon di Blue Destination te na un máksimo di 5 strea. Te ku awe Villa Carina Apartments ta e úniko empresa ku a logra optené e máksimo di 5 strea akí i un biaha mas ta musta ku ta posibel pa kontribuí ku un granito pa un Boneiru sostenibel.

Banda di esaki Fundashon Mariadal a risibí sertifikashon di no ménos ku kuater strea. Fundashon Mariadal a strukturá su prosesonan empresarial den un forma sostenibel.

Durante e próksimo añan an Fundashon Mariadal lo sigui hasi esaki. Un tim di sostenibilisashon tin ku bai implementá esaki. Sertifikashon di Fundashon Mariadal ta un prueba ku tur tipo di empresá por strukturá nan prosesonan empresarial den un forma sostenibel i di e manera akí duna un aporte aktivo na Boneiru komo Blue Destination.

AB Dive, un divishon di AB Car Rentals, tambe a optené tres strea di e sertifikashon di Blue Destination. Nan ta distingui nan mes pa medio di sambuyá den grupo chikitu i di e manera ei ke kontribuí na preservashon di flora i founa di Boneiru. AB Dive tin tambe un propio ret di energia riba energia solar i yenamentu di e tankinan di aire tambe ta sosodé na un manera sostenibel. Greenbikes tambe a optené tres strea i nan ta un empresa bastante nobo na Boneiru. Nan ta e promé

negoshi di skuter kompletamente eléktriko. Di e forma akí nan ta aportá na transporte mas limpi i na redukshon di emishon di CO2.

Kada empresa na Boneiru, grandi òf chikitu, por hunga un ròl aktivo pa loke ta trata sostenibilisashon. Pensa por ehèmpel riba eskohonan konsiente di medio ambiente, prosesa-mentu di shushi òf uso di awa. Sòru bon pa personal, informá i konsientisá kliente òf sòru pa un ambiente seif i limpi ta kontribuí na Boneiru komo Blue Destination. A desaroyá e 'Sertifikashon Blue Destination' pa informá, guia i rekompensá empresanan i organisashonnan riba nan kaminda pa aktividatnan empresarial mas sostenibel i sosial. Boneiru komo Blue Destination ta aspirá un sinergia perfekto entre naturalesa, kultura i ekonomia. Ta protehá i alabes utilizá e rekursonan natural, manera

e oséano ku ta rondoná nos isla. Boneiru komo Blue Destination ta krea un identidat i eksperensia úniko, ku ta distingui Boneiru for di e otro islanan karibense. Blue Destination ta propagá loke Boneiru ta para p'e i ta yuda atraé bishitantenan ku ta kompartí e balornan akí.

Sertifikashon di empresa ta un iniciativa konhunto di e grupo di direkshon Blue Destination, Entidat Públiko Boneiru i Good Travel Guide. Kámara di Komèrsio ta fungi komo 'front office' pa e sertifikashon i Green Destinations komo partido independiente ta ehikutá e ouditoria.

Por mira informashon tokante e empresanan sertifiká riba e wèpsait www.bluedestination.com. Dentro di poko Kámara di Komèrsio ta bai organisá un seshon di informashon tokante Sertifikashon Blue Destination atrobe.

ISMELA B.V.

ta buska

- 5 metselaar

Mas inf. tel. nr **700-7547**





Felis momentu, sea atardi, mainta, anochi, ku ta bai lesa loke mi a skirbi. Dios bendishoná boso. Siman pasá mi a keda 10 dia na Medellin, trep basilá kumpra kos i disfrutá di loke nan tin pa ofresé na e lugá. Masha kos tin i bo no por bai i mira tur loke ku nan tin pa ofresé, kisas tampoko si bo ta biba aya bo ta logra bai tur kaminda. Si, pais grandísimo, miónes di hende i mas. Ma mira hende traha duru na Colombia.

Mi a bai Bogota algun aña pasá na diferente okashon, awor pa di dos biaha Medellin. Ámbos lugá, ta notabel e hendenan ta traha hopi ora pa dia. Sigur mas tantu ku mayoria di nos na Boneiru. Na Colombia e hendenan ta traha te anochi i bolbe sigui su manisé mainta no atardi. Mi no ke kompará i papia ku nos hendenan na Boneiru, no ta hasi nada òf no gusta traha.

Otro kos, no ta tur hende tin e posibilidat den bida ku nos tin na Boneiru. Ta bon pa menshoná tambe, tin hende ku defisiensiá físiko i lógikamente pa nan ta imposibel pa logra loke un hende ku por hasi tur kos. Mi ta papia na esnan ku ta bon i por ehersé labor den bida. Na Boneiru hopi hende ta keha, miéntras si nan ta sufri kebrante di salu, seguro ta paga tur asuntu médiko i pago di dianan di trabou ta kontinuá.

Sigur esei ta bon i ta kosnan bon reglá den lei. Danki Dios, sino hende lo no a sobreviví na Boneiru. Dikon, pasobra pa bon ku nos tin e mes, un trahadó ta keha basta. Mi sa no pasobra mi ta traha den prensa, pero mi a traha den diferente sektor. No ta tur hende, hopi di nan ta keha si. Un ehèmpel, na Colombia, bo mester traha duru, tiki sosiegu i no ta gana hopi. No reklamá, keha nada pasobra, tin 100 òf 300 hende pará tras di porta, pa manera bo no ta traha mas, un di nan drenta na bo lugá. Esei ta hasi e trahadó hopi kouteloso, kompará ku nos aki banda.

HOPI BULADÓ DI TRANKÉ

KRALENDIJK – Tin hopi buladó di tranké riba lista di e partidonan ku a entregá lista di kandidato ayera pa partisipá na e elekshon di Konseho Insular di dia 15 di mart benidero. Riba tur lista tin sorpresa, pero tin tambe un ehérsito di notorio buladó di tranké, ku a bula den nan karera

político no ún, sino mas ku un kurá.

Un dje sorpresanan tabata ku Hennyson Thielman ta enkabesá lista di MPB, pues no Elvis Tjin Asjoe e biá aki, ku tambe ta un persona ku a bula di UPB pa lanta MPB. Thielman ta lider político mas hóben na kabes di lista. MPB a pre-

sentá un lista ku 39 kandidato. Renata Domacassé ta na di dos lugá i Elvis na di tres. Sanne Meijer ta na di kuater lugá, sigui pa Humprey Wout jr.

Riba lista di Demokrat, enkabesá pa Clark Abraham, por mira nòmber di Dudley Wedervoort na di shete lugá. Den pasado el

a aparesé riba lista di UPB.

Na di 8 lugá tin riba lista di Demokrat un otro asina yamá buladó, esta Gianni van den Heuvel, ku den e último elekshon tabata riba lista di MPB. Ta konosí ku e ta asosiá na Nina den Heyer, ku no ta riba lista e elekshon aki. El a sali for di política aktivo i awor ta direktor di OCW.

Sorpresa riba lista di MPB ta presensia di Milena Winklaar, den pasado riba lista di UPB. E ta bini di un kuna di UPB. Su welo Papa Statia tabata fundadó di di UPB huntu ku Rudy Ellis i otro lidernan di promé ora. E tabata miembro di Konseho Insular den pasado.

Lista di Aljano Emerenciana, 1 Union pa Pueblo, tambe ta kontené buladó di kurá. Emerenciana mes tin un trayekto político basta kolorido.

Riba lista di UPB tambe tin buladó di kurá, manera Benito Dirkz, den pasado riba dos lista, entre otro di Demokrat, pa kua e tabata te asta diputado i miembro di Konseho Insular. Tin algun mas, manera Willem Cecilia.

Lista di Demkrat ta konsistí di: 1 Clark Abraham; 2 Rolanda Makaai; 3 Danny Crestian; 4 Salma Serberie; 5 Delno Tromp; 6 Mia Engelhart; 7 Dudley Wedervoort; 8 Gianni van den Heuvel; 9 Taty Frans; 10 Michael Pieters; 11 Nathaniel Melaan; 12 Radira Alberto; 13 Edson Frans; 14 Alsi Anthony; 15 Lisandro Cecilia; 16 Eric DeLanooi; 17 Judmar Rimón; 8 Caroline Cicilia; 19 Evelon Jano; 20 Sindy Selberie; 21 Gairo Martis; 22 Tita Seinpaal; 23 Chinto Carlo.

1	Thielman	H.M. (Hennyson)	Bonaire
2	Domacassé	R.T. (Renata)	Bonaire
3	Tjin Asjoe	E.E.J. (Elvis)	Bonaire
4	Meijer e/v Torres Vazquez	S.H.A.S. (Sanne)	Bonaire
5	Wout	H.J.P.J.T (JunnyWout)	Bonaire
6	Ellis	J.F.E. (Edison)	Bonaire
7	Domacassé	E.R. (Din)	Bonaire
8	Look e/v de Windt	R.V.M. (Richèna)	Bonaire
9	Vrolijk	C.D. (Cyrill)	Bonaire
10	Winklaar	M.N. (Milena)	Bonaire
11	Jansen	M.A.H. (Mazarella)	Bonaire
12	Alberto	A.A.K. (Angelo)	Bonaire
13	Isaza Puerta	V. (Vanessa)	Bonaire
14	Rauwers e/v Vermeulen	D.C. (Debby)	Bonaire
15	Saleh	O.R. (Orphalline)	Bonaire
16	Martines	A.R. (Ashier)	Bonaire
17	Marmol e/v Niels	M.D.V. (Mireya)	Bonaire
18	Curiel	E.C.T. (Eder)	Bonaire
19	Sosa Mendez	D.D.C. (Dilenia)	Bonaire
20	Kwakman	N.L.M. (Nina)	Bonaire
21	Noguer Fernandez	G.R. (Guillermo)	Bonaire
22	Palsgraaf	R.A.M. (Richard)	Bonaire
23	Wong Blanco e/v Ames Diaz	L.V. (Veronica)	Bonaire
24	Domacassé	Z.G.H. (Zai)	Bonaire
25	Wester	R.E.A. (Robert)	Bonaire
26	Frans e/v Paulina	M.M. (Mientje)	Bonaire
27	Sebelon	S.M. (Shellany)	Bonaire
28	Brice e/v Laurent	V. (Valentina)	Bonaire
29	Francees	A.D. (Aquiles)	Bonaire
30	Croes	A.D. (Desirée)	Bonaire
31	Sauveur	L. (Luckner)	Bonaire
32	Martes	R.G. (Rodi)	Bonaire
33	Batta	W.A. (Amancio)	Bonaire
34	Kloos	J.C. (Jan)	Bonaire
35	Frans	W.L. (Wilson)	Bonaire
36	Vis	H.R. (Hubert)	Bonaire
37	Theodora	M.E. (Chon)	Bonaire
38	Janga	R.J. (Jan)	Bonaire
39	Martinus	D.M. (Dennis)	Bonaire

Mariadal ta optené sertifikado ‘Blue Destination’

KRALENDIJK -- Fundashon Mariadal a keda sertifiká den kuadro di ‘Blue Destination’. Mariadal a risibí e sertifikado for di man di Kámara di Komersio. Ku esaki Mariadal ta e di tres kompania pafó di sektor turístiko ku ta optené e sertifikashon akí.

Sostenibilisashon di kuido ta nifiká ku nos ta hasi esfuerso pa logra un

kuido ku konsekuensia mas abou posibel pa klima i ambiente di biba, segun dòkter Giovanny Frans, presidente di direktiva di Mariadal.


E sertifikashon ‘Blue Destination’ ta enfoká riba un ròl aktivo pa empresanan den kaso di sostenibilisashon di nos komunidad. Pensa por ehèmpel riba eskohonan ku ta konsiente di medio ambiente na momentu di kompra di produkto,

prosesamentu di sushi, òf uso di awa i energia. Sòru bon pa personal, informá i konsientisá kliente, òf sòru pa un ambiente seif i limpi tambe ta kriterionan pa sertifikashon, Frans a trese dilanti. Frans ta sigui, na luna di desèmber aña pasá Mariadal a stipulá un plan pa yega na sostenibilidad. Kuido bèrdè ku ta klima-neutral ta nifiká ku nos ta tene kuenta ku ambiente

di biba i ku nos ta emití un kantidat mas chikitu posibel di gas invernadero. Nos ta bai pokopoko ku materia prima i nos ta purba re-usá mas tantu produkto posibel, segun e programa di sostenibilidad.

E programa di sostenibilidad ta tradusí e metanan di sostenibilidad den sinku parti di organisashon, kuido, mobilitat, logístika i kompra, konstrukshon i rekursu humano. Mariadal, segun Frans, ta informá tur

empleado tokante e koherensia entre aktuashon humano, klima, medio ambiente i salú. Banda di esaki Mariadal a instituí un tim bèrdè, ku ta stimulá konsientisashon di su empleadonan. Mariadal ta partisipá tambe na e debate sosial tokante e relashon entre aktuashon humano, kambio di klima i kontaminashon di medio ambiente, un ambiente di biba saludabel i nos salú, Frans a trese dilanti.



Bernard Landwier di M21, ta boga pa:

Algun punto di atenshon pa e hende

KRALENDIJK – Bernard Landwier, kandidato riba lista di M21, ta haña ku mester pone mas atenshon na e hende. Un di e preokupashonnan ku a bati nos isla den e último 13 añanan ta e nivel di bida di un grupo supstansialmente grandi. Rapòrtnan basá riba investigashonnan imparcial a konkluí ku 40% di nos poblashon ta biba den pobresa i ku den esaki tin tambe hende ku ta traha, pero ku nan entrada no ta alkansá pa nan kubri nan obligashonnan finansiero mensualmente.

Di akuerdo ku Landwier, faktornan ku ta kousa e

pobresa aki banda di e entrada abou ta:

1. Kosto di koriente i awa haltu
2. Un falta di transporte públiko pagabel
3. Kosto di kombustibel haltu
4. Preis di hürnan di kas, tantu sosial komo privá haltu.
5. Preisnan di kuminda ku ta oumentá en grande sin ningun klase di kòntrol

Landwier: “Ku sosten i konfiansa di e pueblo votadó, mi kier bai dediká mi tempu den Konseho Insular na e 5 puntonan aki ku e lucha pa despues di 4 aña òf hasta promé presen-

tá na pueblo resultadonan konkreto di un maneho riba e kuater arianan ku e propósito pa baha e gastunan aki i tene nan bou di kòntrol. Nos por, basta nos ke.”

Segun Landwier, salí for di Union Sindikal Boneriano, no por ta otro ku e lo duna tur loke e tin i konvensé su koleganan polítiko pa ban duna kontenido na e lema di e manifestashon di 5 di mei 2022, esta “diferensia si, pero deskriminashon nò”. Boneiru den esaki polítikamente mester papia ku un bos i un mensahe direkshon di Den Haag.



DESENTE I MODERÁ

“Meskos, mi kier pa hende muhé dóna nan mes ku bisti apropiá, desente i moderá, no ku kabei tur na flègt i oro òf pèrta òf bisti kostoso, sino mas bien ku bon obra, manera ta pas pa muhénan ku ta teme Dios.” 1 Timoteo 2:9-10(BS) Hopi di nos ta bati alarma preokupá ku nos ta pèrdè nos normanan i balornan. Ma karnaval ta aserkando i durante di e fiesta ei, trankil hende ta lubidá tur e normanan i balornan ku nan ta pretendé di apresiá asina tantu. Hende ta reklamá e dekadensia den nos komunidad 364 dia pa aña i tòg ta promové dekadensia durante karnaval.

E versíkulo di awe ta siña ku hende muhé mester bisti na un manera apropiá, desente i moderá. Desente ker men; paña ku ta tapa desnudes.

Sea nos ke òf nò, karnaval ta karesé di loke ta desente i moderá. Desnudes, baliamentu vulgar i kantikanan di dòbel sentido ta un problema grandi durante di e temporada akí. Alkohòl i karnaval ta inseparabel, pasobra hende ta purba pa haña kurashi pa hasi aktonan ku nan no sa hasi normal, dor di bebe alkohòl.

Talbes tin hende ku ta partisipá sin maldat den mente. Ma no tin duda ku hopi partisipante ta deseá pa gosa ku piká! I asina karnaval ta keda un fiesta ku ta promové maldat. Pasobra e filosofia tras di karnaval ta; ban hasi piká promé ku kuaresma yega.

Romanonan 6:12-13 ta bisa: “... no pèrmití piká reina den boso kurpa mortal, asina ku boso mester obedesé su pashonnan, i no sigui presentá e miembronan di boso kurpa na piká komo instrumèntnan di inhustisia; ma presentá boso mes na Dios ...” E yamada di awe ta: presentá boso mes na Dios, i E lo yuda bo biba un bida liber di piká, ku norma i balor haltu. Un bida desente i moderá!

Dean Ressler

Produkshon PGM

Disputa entre Kolegio Ehekutivo i ASOTEKO

KRALENDIJK – Lider di Frakshon Coffie den Konseho Insular, Daisy Coffie, ke sa mas di e disputa entre Kolegio Ehekutivo i e organisashon ASOTEKO en kuantu dunamentu den èrfpagt di terenonan públiko i ku e disputa akí ta den Korte Sivil pa tratamentu. P’esei el a manda pregunta pa asina por haña aklarashon tokante e disputa akí ku e petishon pa kontestá esakinan verbal den e próksimo reunion públiko di Konseho Insular.

Coffie ta skirbi: “Ya pa basta tempu mi a bin ta sigui informashonnan den medio di prensa bosiferá pa e konsehero hurídiko di e organisashon ASOTEKO

relashoná ku dunamentu di tereno na èrfpagt. Asta e situashon aki a eskalá di tal forma ku ASOTEKO a kuminsá un kaso sivil den Korte.” Tambe, Coffie ta sigui, e por a tuma nota ku aparentemente partidonan lo a preferá pa yega na un areglo pafó di Korte i ku den esaki tabatin kòmbersashonnan hibá ku mui en partikular e diputado enkargá ku Direktorado di R&O, Direktorado ku ta enkargá ku asuntunan di tereno. Entre tantu Konseho Insular a stipulá un nota pa un kuadro di maneho pa loke ta trata terenonan na Boneiru.

Sin embargo e último informashon ku a sali di e kaso akí, segun Coffie, ta

ku Kolegio Ehekutivo lo no ke firma un proposishon di un areglo pa solushoná e problema akí.

Pregunta

Hasiendo uso di artíkulo 45 di Reglamentu di Órden, Coffie ta hasi e siguiente preguntanan na Kolegio Ehekutivo ku e petishon pa kontestá esakinan verbal den e próksimo reunion públiko di Konseho Insular:

1. Kolegio Ehekutivo por confirmá ku tin un disputa entre Entidat Públiko Boneiru i e organisashon petishon pa kontestá esakinan verbal den e próksimo reunion públiko di Konseho Insular en kuantu dunamentu den èrfpagt di

terenonan públiko i ku e disputa aki ta den Korte Sivil pa tratamentu.

2. Sí e kontesta riba pregunta 1 ta afirmativo, Kolegio Ehekutivo por duna Konseho Insular esensia di e disputa.

3. Ta bèrdat ku e dos partidonan ke a yega na un entendimentu pafó di Korte pa e disputa na mesa?

4. Ta bèrdat ku e esfuersonan akí a yega te na un formulashon di un posibel areglo, kual areglo a karga aprobashon en prinsipio di en todo kaso diputado enkargá ku tereno?

5. Ta bèrdat ku Kolegio Ehekutivo den su totalidat te ainda no a aprobá e areglo presentá i komo tal no tin

un solushon pafó di Korte?

6. Kolegio por a informá Konseho Insular e esensia di e proposishon i fasilitá Konseho Insular e proposishon konkreto i alabes informá Konseho Insular kiko ta e opheshonnan di Kolegio Ehekutivo pa no aprobá e proposishon riba mesa.

7. Kolegio por informá Konseho Insular sí Kolegio Ehekutivo lo a hasi un kontraproposishon teniendo cuenta ku e nota pa e kuadro di maneho di tereno resientemente aprobá pa Konseho Insular i sí ta asina Kolegio Ehekutivo por fasilitá Konseho Insular e proposishon di banda di Kolegio Ehekutivo.

Korteho fúnebre opstakulisá

KRALENDIJK – Últimamente ta surgi un situashon basta fèrfelu na momentu ku un korteho fúnebre pasa dilanti skol básiko San Bernardo.

E korteho fúnebre ta

sali Consuelo Memorial i ta pasa den Kaya Maria Hellmund-Boom, dilanti e skol básiko, rumbo pa Misa di Playa. Problema ta surgi den e orario di 12’or pa 1’or di mèrdia, mirando ku es-

aki ta e orario ku mayoria hende ta buska mucha for di skol. Básikamente tráfiiko ta basta pegá den e orario aki. Tin ku remarká ku kabes di e skol na vários okashon a pidi mayornan pa tene kue-

nta ku e fluho di tráfiiko i no para den kaminda warda e alumno drenta den outo.

Awor por nota ku e korteho fúnebre ta keda pegá den e tráfiiko sin por sigui su ruta. E forlestu ta trata na dirigí e tráfiiko i indiká na shofùnnan pa nan sigui kore. Últimamente e situashon aki a eskalá i a surgi un diskushon den kua

e shofùr a hasi bon kla na e forlestu ku e no ta kita su outo.

Tin shofùr ta haña ku na momentu di prepará e entiero mester tene cuenta ku e orario i e situashon di e skol básiko. Tambe ku e korteho fúnebre mester hasi uso di otro ruta.

E fotonan ta duna un impreshon di e situashon.

Programanan di Bonaire.tv

TELBO kanal 70
Flamingo TV kanal 23

Djamar 31 yanüari 2023

12.00 Programa Politiko:
13.00 Aki Bonaire:


15.00 Herensia Korsou:
16.00 Aktualidat:
17.00 Aki Boneiru:
18.00 Herensia:
19.00 BAPA:

20.00 Programashon:
21.00 Aki Bonaire:
22.00 Herensia:
23.30 Puerto Latino:

MPB ta Informa Episodio 05
Konsierto Maresa Pieter -
DunE tur loka E merese
Leonard Anthony Andres Coffi
Michiel Bijkerk
Regreso di Turismo Krusero
Salvador Tito Thielman
Ashley Thomas

Apel di Oro
Na barik'i dam
Sixto Melfor
Luis Zárraga

Tur mèrdia 12’or ta kuminsá un programashon nobo di 4 ora.
E programashon aki ta ripití pa 24:00.



A yega tempu pa Demokrat drenta Gobièrnu

KRALENDIJK -- A yega tempu pa Partido Demokrat drenta Gobièrnu pa asina e por responsabilisá su mes i komprometé su mes pa sirbi komunidad. Pero pa tur esaki bira posibel, e pueblo boneriano mester disidí ku nan ta bai depositá nan konfiansa i voto den e partido akí. Esaki lider polítiko di e partido, Clark Abraham, a bisa na okashon di presentashon di lista djadumingu anochi.

Noel Janga di Evidencia Real, tabata presente e a fasilitá BONERIANO e siguiente relato. Dia 29 di yanüari Partido Demokrat a presentá na pueblo di Boneiru su vishon i propósito pa ku e próksimo elekshon di 15 mart. Tambe a presentá e kandidatonan ku lo bai forma parti di e lista kòrá. Esaki a sosodé dilanti di un sala bon bishitá i pashoná.

Clark Abraham, e lider polítiko di Partido Demokrat, a duna un presentashon simpel, pero komprendibel di e plan pa ku próksimo paso di e partido den polítika aki na Boneiru.

Vishon

E vishon ta pa fokùs riba solushonnan duradero pa ku e próksimo 12 aña dilanti porta. Esaki ta e reto, segun Abraham, kende a duna di konosé ku ya kaba pa bintikuater aña partido Demokrat no a haña sufisiente oportunidat pa gober-

ná. Ku eksepsion di algun lunanan ku kisas huntu ta suma un aña durante henter e periodo ya menshoná.

A yega tempu pa partido Demokrat drenta gobièrnu pa asina e por responsabilisá su mes i komprometé su mes pa sirbi komunidad. Pero pa tur esaki bira posibel, e pueblo Boneriano mester disidí ku nan ta bai depositá nan konfiansa i voto den e partido akí, Abraham a bisa.

Strategia

E meta, segun Abraham, ta pa sirbi Boneiru den gobernashon e próksimo 12 aña. Pasobra kuater aña no ta sufisiente pa por trese un cambio visibel den nesesidatnan di e pueblo. E pregunta primordial ku nos tin ku hasi nos mes Abraham ta igual ku e teksto bíbliko pará den Mateo 16:26: 'Ki probecho un hende tin di gana mundu, pero pèrdè su alma'.

E interpretashon di e teksto aki conforme e konteksto ku e ta pará aden ta, ki bal bo ta eksitoso den mundu den bista di hende, pero no konosé Señor Hesus ni ta rekonosé komo e salvador di bo alma. E éksitonan terenal lo no ta di ningun balor ora e parti inmortal di e ser huma, esta e alma bandoná e kurpa.

E interpretashon personal ku Abraham a duna e teksto akí ta: "Boneiru kier gana rònt mundu pero

den proseso di esei e ta pèrdiendo su mes, Boneiru ta pèrdiendo su alma. Boneiru ta pèrdè atenshon pa su hendenan, Boneiru ta pèrdè atenshon pa su ser."

Esaki ta e motibu di kon Boneiru mester di un gobièrnu responsabel pa solushoná e situashon akí. Duna pueblo e atenshon i servisio ku e meresé pa nos no sigui disolvé nos identidat, Abraham a bisa.

Definishon

Demokrat kier mira un Boneiru hustu i duradero, ku e boneriano liber i orguyoso di su identidat trahando den harmonia pa un mihó porvenir. Pa logra loke nos ke hasi, Demokrat ta konvensí ku mester invertí den e hende pa e tin e konosementu, kapasidat, seguridat, libertat i kurashi pa ta e cambio ku e ta deseá pa su mes i pa Boneiru, segun Abraham.

Abraham a insistí ku, nos por bisa ku nos kier, kam-

bia tur kos nan eksterno, pero si nos no kambia nos mentalidat, ta awa nos ta hibando laman. Ta esensial pa kada siudadano kuminsá traha ariba renobamentu di nan mentalidat. E propósito ta pa kambia mentalidat di nos komunidad, ta pa nan rekonosé loke tin balor i loke no tin balor. E enfoke mester ta riba kosnan ku tin balor di bèrdat. Pasobra no ta tur kos ku ta bria ta oro. E kosnan material no ta mas importante, pero e hende su nesesidatnan.

Tambe Abraham a sita un dicho di Markus Garvey: "Un pueblo sin konosementu di su historia, orígen i kultura ta manera un palu sin rais." Si bo no sa di una bo ta bin, bo no sa tampoko na unda bo ta bai. Nos mester bai bèk den ken nos ta. Nos rais ta mas importante ku nos taki i nos blachi. Nos forsa ta kuminsá ku nos mes komo boneriano. Sí nos ta konvensí orguyoso di ta liber den ken nos ta,

mundu ta habri pa nos. Pero bou di nos kondishon komo boneriano. Nos no mester laga otro definí esei pa nos.

Propósito.

Segun Abraham, ta un propósito tin, nos mester gana elekshon. No gana na voto, pero gana na asiento. Nos mester tin mayoria na asiento pa nos por ehekutá e vishon di partido Demokrat. Sinku asiento den Konseho Insular ta e garantia pa kumpli ku e vishon. Si bo kier kambia hende, bo no por logra den kuater aña. Por lo ménos 12 aña ta nesesario, pa bo por influensia un generashon. E prosedura pa logra e vishon i alkansá e propósito ta, gana elekshon ku mayoria absoluto. Goberná por lo ménos 12 aña. Maneho hustu i duradero.

Sin esaki, Abraham ta konvensí ku partido Demokrat lo no por kumpli ku su vishon pa ku Boneiru.



Mesa rondó lokal pa:

"Analisá relashon ku Hulanda i den Reino"

KRALENDIJK -- "Nos energia lo ta pa korigí loke ta in hustu i diskriminatorio kontra nos hendenan i no bringa pa mustra ken a faya. Nos lo boga den esaki pa e posishon aki keda kargá pa tur gremio den nos komunidad i asina Boneiru kompletu papia ku un bos i un mensahe." Esaki kandidato riba lista di M21, Bernard Landwier, ta trese dilanti den un komunikado.

"Lo mi pusha pa bin un konferensia di mesa rondó lokalmente pa asina analisá nos relashon ku Hulanda i den Reino, pero tambe eksplorá nos posibilidatnan den regio i otro partinan di mundu, entre kual Union Oropo, pero tambe Venezuela, Colombia i Estádos Unidos", segun Bernard Landwier. "Nos ta parti di e region i nos por nifiká algu pa otro na bienestar di nos komunidadnan. Pa

chikí ku nos por ta, stratégikamente nos ta bon situá entre América i Oropa i nos lo mester bai hasi mas uso di esaki." Tambe lo bai analisá e responsabilidatnan ku Boneiru mes tin riba nivel laboral i nan lo bai na pèrkurá pa no tin abuso ni eksplotashon di e ser humano na boka di trabou, kaminda lo bai duna sindikalismo un lugá importante den nos maneho sosial/laboral.

Purpose Group B.V.-Vadavas

se busca

- vendedora

-tener afinidad y experensia con Vadavas

Por mas inf. tel. nr **+599 701-1770**

ò personalmente por la Kaya Grandi # 15

BECS

ta buska

Persona femenina i maskulino pa limpieza

- Mester por traha den tim.
- Mester traha segun rooster.
- Mester tin 1 aña di eksperensia den trabounan rekerí.

**Pa mas info por yama 717-2197 òf
pasa na Kaya Antonia #3**

E AFÈR DI LD GERHARTS

Outor Rene Roders



8

Na mas ku un okashon kasonan di inmoralidat seksual a aparesé den arena polítiko boneriano. E dos proménan tabata den dékada sinkuenta di siglo pasá. Den promé mitar di dékada sesenta tambe tabatin un kaso asina. Broertje Janga tabata e víktima. Den un seri di artíkulo **BONERIANO** ta publiká, basá riba un buki ku Rene Roders a skirbi aña pasá.

Investigashon di keho

Van der Meer, desde promé di aprel 1956 minister di hustisia, ta laga aparentá di lo bai atendé serio ku e keho di LD Gerharts i ta laga hasi un investigashon. Sup-fiskal mr. J.R. Brouwer i sup-inspektor Richie ta ehekutá e investigashon aki.

Richie ta bira, despues di hues Roose, e segundo matadó di bestia ku ta kontrolá su mes karni.

Mi no a logra haña teksto di e investigashon i pues no sa ku si nan e tende LD mes, Milo Croes i e polis (Goi) Coffie. Un persona ku sí a skucha tabata hefe di polis Jelle Johannes. Esaki ta bisa ku na diferente okashon el a bishitá LD na su kas huntú ku Wassink. I ku nunca el a opservá ku Wassink a

intimidá LD.

Mi ta di opinion ku kisas Wassink tabata violento i korupto, pero no kèns. Lo tabata un aktitut hopi bobo di su parti pa bai intimidá LD den presensia di su hefe. Pero lòs di esaki, Johannes realmente no a komprondé ku e keho di LD no tabata referí na su bishitanan na kas di LD i riba e persona aki, sino riba otro arestado i testigunan menor di edad? Honestamente mi no por imaginá mi mes esei.

Karta di PG

Relashoná ku e keho aki LD ta risibí dia 7 di òktober 1956 un karta di prokurador-general interino, fechá 5 di novèmber 1956, den kua e ta partisipá ku el a risibí e siguiente partisipashon di minister di hustisia: "For

di e investigashon tokante maltrato i intimidashon a resultá ku e kehonan aki no ta basá riba bèrdat."

E minister ademas enfátikamente ta defendé e polisnan embolbí, entre kua Wassink: "No ta fásil pa dia'den i 'dia'fo traha den un komunidad neurótiko i pa bo mes keda komplementamente neutral."

E minister ta ekspresá speransa ku, awor ku e kasonan di delito moral ta tras di lomba, trankilidad lo bini bèk riba e isla. Un dia despues Amigoe ta publiká e karta aki riba su promé página.

Pregunta

E karta ta lanta tres pregunta. Esun promé ta: e minister a verifiká sufisientemente kualidat i opetividat di e investigashon? Mui probabel esaki no a sosodé, pasobra e ora ei e lo a intervení ora ku a agregá Richie na e tim di investigashon. Pues ku Richie ta embolbí ku e investigashon i e ta hefe di Wassink i Pietersz.

E di dos pregunta: kon

por ta posibel ku den e kaso di Schouten abogado Van der Meer ta pone siguridat hurídiko na òrdu i ta pone na duda integridat di e kuerpo polisial en general, di Wassink en partikular, anto ni dos aña despues, awor komo minister, ta sali na protekshon di mesun kuerpo kontra e komunidad 'neurótiko' di Boneiru. Kuerpo polisial i Wassink den un lapso di tempu kòrtiku asina por a keda purifiká di e karakteristikanan aki?

Honestamente bisá, mi no por imaginá mi mes esaki. E testimonionan di Milo Croes i Coffie ademas ta pone bo soponé otro. E aktitut skèrpi di Van der Meer komo abogado a disparsé komplementamente despues ku el a bira minister, ku komo konsekuensi ku e ta guli manda abou fásilmente e falta di kualidat di e resultadonan manká di e investigashon. Esaki ta forma pa mi motibu pa duda den e ophetividat i integridat di minister Van der Meer.

Mi tin tambe un huisio riba e kualifikashon di e minster den su karta tokante e poblashon di Boneiru. Van der Meer ta minister di Antia Hulandes, pues tambe di Boneiru. E huisio ku e ta dikta riba komunidad di Boneiru no ta digno di un minister. No solamente esaki ta krea e suposishon ku e tin prehu isio kontra poblashon di e isla, sino ta mustra tambe ku e tin menospresio pa habitantenan i e ta arogante.

Duda

E duda ku mi tin riba e manera di proseder i huzga di e minister ta keda fortifiká pa un alineá den

e relato di e akontesimentunan den e archivo di LD. E ta skirbi den esaki ku Wassink ta konta repetidamente ku abogado Van der Meer durante e proseso Schouten, siendo ku na mes momentu e tabata defendé LD, tabata su consehero i ku e tabatin influensia riba dje. I ku Van der Meer lo paga bon tinu pa hasié algu malu.

Segun mi, e ponensia aki ta konektá bon riba e informe den Amigoe di 10 di sèptèmber 1954, den kua Van der Meer inesperadamente ta laga su petishon na korte kai pa skucha kuater polis, entre otro Wassink, pasobra e no ta haña esaki plasentero pa prestigio pa un dje testigunan.

Mi duda na ophetividat i integridat di Van der Meer ta kèntel komplementamente ora mi deskubrí ku na 1957 e ta duna ménos peso na e konsepto di 'siguridat hurídiko', di kua e tabata boka yen i papiando ku bos duru durante tramentu di e kaso Schouten.

Na luna di mei e aña ei e ta duna prokurador-general òrdu pa ekspulsá e periodista De Wit di e korant 'Beurs- en Nieuwsberichten' for di Kòrsou.

E periodista aki tabata bibá for di 1940 na Kòrsou. Motibu di su expulshon tabata ku e tabata lansa kítika inaseptabel i pèrmisibel kontra gobièrnu.

Ora ku PG a oponé kontra esaki, komo ku un akshon asina lo trese tantu libertat di prensa komo derecho konstitushonal na peliger, a retirá e PG mes. Aparentemente e konsepto 'siguridat hurídiko' ta elástiko serka minister Van der Meer.



Warda di polis di Kralendijk den tempu di e kaso di LD Gerharts.

DUSHI TEMPU DI TELEVISION

Bonanza

Ku e seri aki mi ke hiba boso den tempu. Mi ke rekordá huntu ku esnan ku a lanta den añanan sesenta i setenta television di e tempu aya. Television “pretu ku blanku”. Tambe pa laga e generashon despues sera konosí ku loke tabata dibertishon pa mucha, hóben i adultonan den dékadanan sesenta i setenta riba nos isla. Tele-Curaçao a drenta operashon dia 31 di yüli 1960.

Bonanza

Un seri di television hopi popular den dékada sesenta tabata Bonanza. Tabata un seri di e género ‘western’. Den bok’i pueblo yamá kòbòi. E seri aki, produsí pa NBC, a kore di 31 di sèptèmber 1959



Lorne Green (Ben Cartwright), kabes di famia Cartwright.

pa 16 di yanüari 1973.

Den periodo largu ku Bonanza a kore pelikulan di western tabata hopi gustá. Djis pensa riba pelikulan manera ‘Once upon a time in the west’, ‘The Good, the Bad and the Ugly’, ‘For a few dollars more’, ku aktornan manera Charles Bronson, Henry Fonda, Clint Eastwood, Lee van Cleef i hopi otro.

Bonanza a bai den historia komo e seri di television di NBC ku a drai mas largu. El a bai 14 temporada, ku un total di 432 episodio. E ta e segundo seri ku a drai mas largu na television merikano, despues di Gunsmoke di CBS. Ketu bai e seri aki

ta drai den sindikashon, manera ta yama esaki.

Esenario

E esenario (dékada 1860) pa Bonanza ta un region den besindario di Virginia City, Nevada, pegá ku Lake Tahoe. Bonanza a start inisialmente ku Lorne Green, Pernell Roberts, Dan Blocker i Michael Landon. Mas despues Guy Williams, David Canary, Mitch Vogel i Tim Matheson. E seri ta konosí pa presentá dilemanan moral.



Ponderosa Ranch di famia Cartwright.

Bonanza ta bai tokante famia di Ben Cartwright, doño di Ponderosa Ranch. E título ‘Bonanza’ ta un término usá pa mineronan, REGARDANDO un bena òf depósito grandi di plata. E palabra ‘bonanza’ ta bini di spañó. E ta referí na prosperidat, ku ta relatá na e revelashon di ‘Comstock Lode’, un área di minanan di plata deskubrí pegá ku e siudat Virginia City, no leu for di e fikshonal ‘Ponderosa Ranch’ operá pa famia Cartwright’.

E tema musikal di Bonanza a bira sumamente popular.

Lorne Green

E protagonista den Bonanza tabata Lorne Green. El a nase dia 12 di febrüari 1915 komo Lyon Himan Green na Ottawa, Ontario, Canada. El fayesé dia 11 di sèptèmber 1987 nan edat di 72 aña.





Un dje yunan di Ben Cartwright hopi popular den e seri tabata Hoss (Bobby Dan Davis Blocker). El a nase dia 10 di desèmber 1928 na De Kalb, Texas (USA). El a muri na edat di solamente 43 aña na 1972 na Los Angeles, California, USA.

MONCHI & TONCHI

Promé ku elekshon ya kaba tin partido a kometé ladronisia.

Awèl sí. Bo ke men ku M21 a hòrta pida nòmber di M19?



KOLOFÓN

Editor: Bonaire Communication Services N.V.
Kaya Irlanda 12,
Tel. 717-8482

Redakshon: extrabon@gmail.com
avisobon@gmail.com
Wèpsait: www.extraboneiru.com
Facebook: Extra Boneiru

Direktor
Shirley Martis
785-3824
796-3824

Redakshon
Papi Antoin
Nathaly
Evertsz-Ipcedencia
Davienuska Janga
Velli Gijsbertha
Edson Pietersz
Ibi Piar (deporte)

Partner na Aruba
Awe Mainta
Partner na Kòrsou
Extra
Partner na Boneiru
Live99

Layout
Davienuska Janga
Maya Beaumont

Konsehero:
Bòl Antoin
786-6818
Aviso
avisobon@gmail.com

Clark Abraham:

“Nos ke mira un Boneiru hustu i duradero”

KRALENDIJK—Hendenan di Demokrat dja-dumingu anochi a presentá kandidatanan riba lista pa elekshon di 15 di mart binidero. Hendenan ku ta simpatisá e partido, tabata presente i por a tende e mensahe kla, ku Partido Demokrat ta bai pa 5 asiento. Hopi aña nan a logra 3 asiento i awor nan ke 5 asiento. Laga nos drumi ku un wowo habrí, pasobra sí nos drumi ku ámbos wowo será, e otronan ta pasa nos dilanti sin nos mira nan.

Tin mas partido na Boneiru i tur a sali for di e skol kòrá.

Peter Silberie, presidente di direktiva di Demokrat, a bisa mester di e reunion públiko manera ántes, pa nos por ekspresá loke ta nesario pa e pueblo sa. Bo ta tende gritunan manera, no tin awa pa laba sèrbètè pa seka. Kam-bio ta tuma tempu. Nos no ta pensa mas riba 4 aña di programa. Tin proyekto ta tuma hopi tempu.

P’esei lider di partido

Clark Abraham a bisa Partido Demokrat ta bai pa un programa di gobernashon di 12 aña. Mester duna chèns na nos mes hendenan, e oportunidat pa okupá funshonnan, sino ta otronan ta yena loke ta bashí. Nos mester di un ekipo grandi. Demokrat tin hopi hende riba diferente tereno.

Clark Abraham, lider polítiko di Demokrat a

bisa: “Nos ke mira un Boneiru hustu i duradero, ku e boneriano liber i orguyoso di su identidat. Demokrat ta konvensí ku mester inbertí den e hende.

Nos rais ta mas importante ku e taki i blachinan. Nos mester gana elekshon. Nos mester bai pa 5 asiento pa logra nos metanan.

Bo no por motivá un generashon den 4 aña. No

ta kandidato so ta bai kore kampaña. Huntu nos mester hasié pa logra. Forsa di un palu ta su rais. P’esei Demokrat tin hopi aña eksistensia.”

Pa ta bo mes den mundu ku kontinuamente ta intentá di hasi bo algu otro, ta e logro di mas grandi.

A traha un lista balansá riba tur tereno. Hòmber i muhé. Abraham a bisa.



Amely Janga a gradua

KRALENDIJK -- Na aña 2011 Emely Christina Janga a kuminsá su estudio di enfermera. Tabata na 2016 ku el a risibí su diploma di enfermera. Na 2020 el a kuminsá kana su trayekto pa su próksimo estudio avansá. E tabata tin e opshon

básiko pa bai kuido intensivo, òf enfermera na kuido di emergensia. Na final pa a skohe entre nan dos pa terminá su estudio, Emely a disidí pa skohe pa kuido intensivo. Djabièrñe 27 di yanüari tabata dia di su graduashon ku éksito i a risibí su diploma di ICU kual

ta pa kuido intensivo.

Mayornan di Emely ta dese’è tur klase di éksito den su trabou nobo na Fundashon Mariadal i e meta pa sigui pa dilanti den futuro.

Masha pabien di parti su famia, nos ta orguyoso di bo.



Durante lunch na su bishita resien

Minister Dijkgraaf a haña hopi informashon di FuHiKuBo

KRALENDIJK – Minister dr. R.H. (Robbert) Dijkgraaf di e partido D66 durante su bishita resien na Boneiru a haña hopi informashon serka representantenan di Fundashon Histórik Kultural Boneriano (FuHiKuBo). E mandatario a keda sumamente impreshoná ku e trabou ku FuHiKuBo ta hasiendo pa 25 aña kaba, kolektando historia oral, studiandom historia, kultura i naturalesa boneriano i nan konekshon ku otro. Tres piedra di fogon, manera Bòl Antoin di FuHiKubo ta yama e tres elementonan aki.

Durante un lunch na e restorant riba tereno di SGB, Chez Nous, minister Dijkgraaf di OCW, a

skohe pa sinta na mesa ku drs. Emma Pratt, Bòl Antoin i drs. Cees Luckhart di FuHiKuBo. Mas aleu a sinta na mesun mesa Joel Candelaria i Jennifer Martis, ku ta hopi embolbí ku FuHiKuBo.

Banda di papia riba sklabitut, a pone hopi atenshon na e trabou ku FuHiKuBo riba tereno di historia, kultura i naturalesa.

Un dje preokupashonnan ekspresá pa Bòl Antoin di FuHiKuBo tabata e falta di kapasidat pa warda informashon digital, manera e programanan Herensia, otro programa i dokumental ku FuHiKuBo a traha, miles di kasèt dioudio, foto etc. A pensa aki entre otro riba Instituut Beeld en Ge-



luid, ku parse ta haña subsidio di OCW. Pa material tangibel, manera foto, buki, revista etc. FuHiKuBo a haña espasio na Post & Archief pa warda material.

E djadumingu anterior minister Dijkgraaf mainta a bishitá e kasnan di katibu na tantu Kabayé komo Peleké/Sedusuk. Na kamin-da pa e sitionan, tambe na e sitionan mes, Bòl Antoin di Fundashon Histórik Kultural Boneriano (FuHiKuBo) a duna splikashon amplio di historia di Boneiru, ku énfasis riba sklabitut, en konekshon ku e aña aki lo konmemorá 160 aña di abolishon di hendenan hasi katibu.


Último lunanan tin hopi atenshon di parti mandatarionan hulandes pa e tema di historia di sklabitut. Un instituto rekonosé pa su embolbimentu ku historia di e isla aki ta FuHiKuBo. Parlamentarionan hulandes, sekretario di estado Alexandra Van Huffelen enkargá ku Relashonnan den Reino i Digitalisashon, sekretario

di estado dr. Gunay Uslu (D66), minister Robbert Dijkgraaf ta djis algun di mandatarionan hulandes ku último lunanan aki a bishitá FuHiKuBo, ku e aña aki ta bai kumpli 25 aña di eksistensia. Banda di e mandatario, hopi ámtenar tòp riba tereno kultural, a bishitá FuHiKuBo últimamente.

Nèt promé ku minister Dijkgraaf a biaha pa Aruba ayera mainta el a hasi un tour pa parti sùit di Bonaire pa pone su mes na altura di historia di salu i sklabitut. Bòl Antoin di FuHiKuBo a duna splikashon. E último añanan Antoin huntu ku John Schermer i Cees

Luckhart a profundisá hopi den e material aki. Dentro di poko lo sali e segundo edishon di un buki ku Luckhart i Antoin a skirbi huntu.

Antoin a splika di e nesidat ku tin, na su opinion, pa material di skol ku ta splika historia i kultura di Boneiru. “Na skol nos a siña ku Piet Heyn tabata un hérue ku a konmiskistá e flora di plata riba e spañónan. Nos tabata kanta e kantika di ‘Piet Heyn en de zilveren vloot’ ‘uit volle borst’, pa despues realisá ku e hòmber aki tabata un pirata ku a mata hende pa hòrta karganan balioso di plata di e barkunan spaño.”



Daisy Coffie tòg na kabes di M21

KRALENDIJK – Daisy Coffie ta aparesé tòg komo kabesante di lista di M21, no opstante ku el a bini no masha bunita den notisia algun siman pasá, relashoná ku e afèr ku a surgi tokante un aviso di deurwaarder tokante benta di su outo, pa motiubu ku e

no a kumpli ku pago di impuesto.

“Esaki ta e lista di M21, un lista balansá ku un grupo dediká i desidido pa trese e diferencia!”

Ata e diferencia a yega!”, Daisy Coffie a skirbi riba su cuenta di facebook ayera.

Analistanan polítiko no

a kere ku Coffie lo a postulá su mes tòg komo kabesante di e lista di M21. Loke a pasa kuné no ta kuadra ku e lema di integridat ku e ta usa kada bes. Awor e lo mester bai saka ‘integridat’ for di su bokabulario.

Aki’bou por mira e lista di M21.

Bernard Landwier

Penshun General prioridat riba agènda

KRALENDIJK – M21, partido polítiko nobo, lo traha estrechamente ku e ministerio di asuntunan laboral i sosial pa krea un maneho koherente. Introdukshon di un Penshun General lo ta haltu riba agènda di e partido aki, segun Bernard Landwier, kende lo ta riba lista di M21.

Landwier: “Lo nos promové pa bin ku CAO-nan sektorial, miéntas ku nos lo stimulá pa krea un instituto di formashon pa ku funshonnan den nos industria mas importante te awor kual ta turismo. Pa loke ta ‘uitzendbu-

reau-nan nos lo bai hiba un maneho severo pa nan kumpli kabalmente ku nos leinan vigente.”

Segun Landwier, tur loke e ta trese aki ta realisabel i ta realístiko pa ehikutá. Pero pa logr’é M21 mester di sosten, apoyo i konfiansa di pueblo en general i di e klase trahadó i su famia en partikular.

Landwier: “Nos lema di M21 ta ku si nos ke, nos por i ta esei ta e diferencia ku nos kier trese den e ambiente polítiko/gubernamental na Boneiru. E biento fresku mester supla. E diferencia.”

Boneiru ta tuma New York City over

Inspirá futuro biahero ku eksperensia kulinario

KRALENDIJK -- Tourism Corporation Bonaire (TCB) a organisá diferente anochi di 'Taste of Bonaire' na New York City pa konsumidó, medionan di komunikashon i partnernan komersial, komo parti di su strategia di 'Culinary Capital' pa 2023 i reposishonamentu di nos isla komo un paraiso kulinario.

A organisá e eventonan djamaris 24 di yanüari, den kolaborashon ku Kòrsou i St. Maarten. E enfoke tabata riba partnernan di e medionan di komunikashon mas importante ku ta konsistí di vários eskritor, redaktor i 'freelancer'.

E fiesta di amigu Karibe

Hulandes tabata un eksperensia íntimo ku sorpresanan kulinario, historia i e último informenan aktual di e islanan. TCB a invitá e talentoso shèfkòk boneriano, Chelsey Domacassé, kende a tuma e inisiativa di prosená nos famoso stobá di kabritu, funchi i pika krioyo den e eksperensia kulinario.

Shèfkòknan talentoso di e tres islanan, a prepará e sena kompleto kaminda e énfasis tabata riba ingredientenan lokal, kushinamentu 'live' i interakshon.

Djárason 25 di yanüari Boneiru, den kolaborashon ku Kòrsou, a organisá un 'trade dinner', kaminda a



invitá agentenan di biahe di den region di New York City pa gosa di un eksperensia úniko di sena. "Ta bunita pa eksperensia e sinergia i kolaborashon entre St. Maarten Tourist Board, Curacao Tourist Board i TCB. Nos ta kere fielmente den kolaborashon i 'partnership' pa inspirá mundu pa bishitá un di e islanan Karibe Hulandes. Personalmente tabata fantástiko pa mira nos talento kulinario

Chelsey den akshon, loke ta konfirmá nos vishon pa promové Boneiru komo 'Culinary Capital,'" segun Miles Mercera, direktor di TCB. Dia 26 di yanüari TCB a partisipá tambe na e 2023 Travmedia's International Media Marketplace (IMM). IMM ta e evento mundial prominente di ret ku ta trese e industria di biahe den kontakto ku periodistanan tòp, redaktornan, 'influencers' i lokutornan. TCB, den kolaborashon ku

Diamond PR, e ofisina di relashonnan públiko di Boneiru, a organisá henter e siman komo parti di su plan di akshon pa 2023.

Durante e evento di IMM Boneiru tabatin oportunidat pa kompartí e informenan mas aktual di nos isla, manera e programa di Bonaire Bond, Bonaire Yoga & Wellness Week, Bonaire Rum Week, aktualisashon tokante 'airlift', aktividatnan nobo, akomodashonnan i mas.



Daisy Coffie i Aljano Emerenciana

Krítika kontra aktitut di prensa

KRALENDIJK -- Sigurdos lider polítiko a lansa krítika kontra prensa ayera durante entrega di lista. Ta trata di Aljano Emerenciana di Union Pa Pueblo i Daisy Coffie, lider di M21, ku pa promé bes ta bai partisipá na elekshon. Ámbos polítiko a generalisá. Nan no a menshoná nòmber di e bestia na su nòmber.

Aljano Emerenciana: "Tin periodista ta laga pueblo skucha loke nan ke.

Esei no ta korekto. Prensa mester ta neutral i informá pueblo."

Aljano a yama su mes un lider pa sirbi e pueblo. "Nos no ta djòin kapitalista. UPB a pidi mi pa djòin nan i a ofresé mi posishon nr. 3 riba lista. Mi a nenga nan. Awe por mira ken nan a pone riba nan lista na posishon 3. Boso no ta aseptá traishon. Nos ta 14 kandidata fuerte pa elekshon binidero!"

Daisy Coffie tambe aparentemente tambe tin problema ku prensa: "Kada kandidato di M21 tin nan facebook i por sigui informashon di partido riba nos facebook page. Prensa ta importante, nan ta informá pueblo. Mester mantene asina i no ta aktua otro. Pasobra mi a tende ku prensa a bisa ku nan ta bai kobra pa tur kos ku tin di aber ku polítika. Esei no por!"



Lider ta Aliano Emerenciana

1 Union Pa Pueblo den kontienda elektoral

KRALENDIJK -- 1 nashon ta elite. Mester Union Pa Pueblo tambe a entrega lista mèrdia. “Nun- ka nos a keda for di elek- shon. Nos ta úniko ku a keda. Hopi traba tin. Hopi app a bai bin pa wanta nos abou. Nos ta e úniko ku por sali pa e pueblo mar- giná”, Aljano Emerenciana a bisa.

“Tur partido den gober-

nashon ta elite. Mester buta kos den balansa. 4 aña mal gobernashon. Pueblo di parti di pobernan ta san- grando. No tin atenshon pa esnan den nesesidat. Mi ta bai papia ku pueblo pa informá nan, kiko nos ta bai hasi pa nan. No permití otro lidernan di partido drenta boso kas.”



	naam	voorletters
1	EMERENCIANA	A. C.
2	JANGA	F. J.
3	CROES	S. J.
4	EMERENCIANA	R. J. F.
5	KOWID ev KELLER	R. T.
6	HART	L. G.
7	VAN DER WERNE	D. J. E.
8	PIETERS	A. L. J.
9	MARCHENA	E. M.
10	MARTIS	G. S.
11	GOELOE ev PETERS	L. M.
12	LAKE ev LAUFFER	M. C. A.
13	WIJMAN	R. C.
14	de Palm	F. A.

Entrega lista di M21 di Daisy Coffie

Ayera mèrdia 30 di yanüari, un grupo di simpatisante huntu ku Daisy Coffie di partido M21, a hasi entrega di lista. Daisy a bisa: “Tin ku bai buska di unda nos a bin i nos prinsipio. Pa por hasi esei mester tin un gobernashon transparente. Duna barionan loke nan meresé. Kada siudadano meresé nan derecho.”



Lista di Kandidato Elekshon di Konseho Insular 15 di mart 2023



1. Désirée Coffie



2. Bernard Landwier



3. Dayanara Janga



4. Carlos López-Natera



5. Alberseeto Cecilia



6. Angelo Engelhart



7. Alfred Burgos



8. Zuleykha Statie



9. Norbert Tadema Damman



10. Nadine Emerenciana



11. Anthony Weber



12. Amaro Gerard



13. Kjell Koon



14. Robert v.d. Vechte



15. Esther Zimmerman



16. Norman Warner



17. Benrick Martis



18. Mireille Saragoza-Korsten



19. Jurien Ascencion



20. Lorna Martis



21. Arnoldine Helmyr



22. Waldi Deira



7902121



WWW.MOVEMENTU21.COM

Demokrat ku kampaña fuerte

KRALENDIJK— Partido Demokratiko Boneriano (Demokrat) tambe a entregá lista di kandidato. Clark Abraham a bisa ku nan ta bai ku un partido fuerte e elekshon binidero. “Nos ta bai elekshon ku 23 hende, pasobra Boneiru mester ta goberná fuerte i hustu. Nos ta bai un kampaña fuerte pa logra 5 asiento.”



Lista di Demokrat:

- | | |
|--------------------------|----------------------|
| 1 Clark Abraham; | 13 Edson Frans; |
| 2 Rolanda Makaai; | 14 Alsi Anthony; |
| 3 Danny Crestian; | 15 Lisandro Cecilia; |
| 4 Salma Serberie; | 16 Eric DeLanooi; |
| 5 Delno Tromp; | 17 Judmar Rimón; |
| 6 Mia Engelhart; | 18 Caroline Cicilia; |
| 7 Dudley Wedervoort; | 19 Evelon Jano; |
| 8 Gianni van den Heuvel; | 20 Sindy Selberie; |
| 9 Taty Frans; | 21 Gairo Martis’ |
| 10 Michael Pieters; | 22 Tita Seinpaal; |
| 11 Nathaniel Melaan; | 23 Chinto Carlo |
| 12 Radira Alberto; | |

UPB ku 25 kandidato

KRALENDIJK—Partido UPB enkabesá pa James Kroon, a hasi entrega di lista djaluna trai mèrdia. El a splika ku tin un kambio riba e lista i ku lo bai elekshon ku 25 kandidato. “Tur hende a yuda pa un lista bon balansá, barku a bai laman, matrosnan ta konosí i nos ta bai pa loke pueblo a vota p’e.” Segun Kroon e ta kontentu ku Ramonsito ta bèk ku e partido. “Loke nos a lucha pa logra na 2010, a bai benta un banda. Awor nos ta bai pa atendé

nan. Ban pa 5 asiento pa nos hasi loka mester hasi. Nos ke tin un partido fuerte den balansa. Hopi hende a bin biba aki i nos mester guia tur den bon pa nan i pa nos ta stabil.” Mester remarká ku Ramonsito Booi tabata basta kritiko den su opinion di Elvis Tjin-Asjoe: “Niun ora so mi no a bai laga UPB. Semper mi tabata tei. Mi ta kontentu ku James Kroon, un persona ku a keda karga partido apesar di e tempunan

difísil. Semper el a keda i no a hasi manera e buladó di kurá ku nos konosé. M’a mira yen di show un ratu pasá, entre nan e buladó. E buladó ta primintí yen di kos i no a kumpli. Elvis buladó no a kambia. Semper ora kos bai robes, e ta bisa ta falta di partido. Nunka ta su motibu. Nos di UPB ta para pa e boneriano. Nos ta para pa loke nos ta kere aden” tabata algun palabra di Booi.

- #1 Kroon, P.J. (James)
- #2 Felida-Chirino, S.B. (Jona)
- #3 Dirksz, B.R. (Benito)
- #4 Groenman, R. (Roderick)
- #5 Silberie, N.F. (Gerald)
- #6 Jonis, C.T.J. (Cedrick)
- #7 Domacassé, M.C. (Michealangelo)
- #8 Wilsoe, R.B.J. (Nolly)
- #9 Cecilia, W. (Willem)
- #10 Manuel, S.C. (Stanley)
- #11 Seraus, G.M. (Gunter)
- #12 Thodé D.G. (Kiri)
- #13 Pauletta, L. (Lacey)
- #14 Daal, Y.I. (Yatzury)
- #15 Flores, E.I. (Evan)
- #16 Mata, A. (Angelo)
- #17 Abrahamsz, M. (Usha)
- #18 Hersilia, V.A. (Vurgel)
- #19 De la Rosa, A.M. (Alondra)
- #20 Willmore, M.D. (Mervin)
- #21 Cicilia, J.J. (Jonathan)
- #22 Beaumont, R. (Roderick)
- #23 Felida, I. (Ilse)
- #24 Balentin, N.M. (Nakisha)
- #25 Garcia, F.V. (Franxante)
- #26 Janga-Mercera, Senaida



Thielman na kabes di MPB

KRALENDIJK— “P’ami ta un honor pa karga e posishon ku mi a haña. Mi ku Elvis Tjin Asjoe a papia algu i di bèrdat e ta demostrá loka e ta bisa. Nos tin un lista

fuerte. E hendenan ta bisa mi nan ke hasi orashon i ta bai pe, no ta importá si nan no haña hopi voto. E partido aki ta esun ku mester pa guia Boneiru den e direkshon korekto. Nos a

governá serio i ta mira e resultado. Boneiru ta den desaroyo i e hende lokal mester di dje. Mi ta sigur e lista ku nos tin ta esun ganadó!”, tabata palabranan di Hennyson Thielman.



Elvis Tjin Asjoe, i su grupo di hende di partido blou pa MPB tambe a entregá lista djaluna 30 di yanüari. Elvis Tjin Asjoe: “Un lista balansá ta loka MPB a pone kla. Tabata fásil pa yena lista, solamente e ponementu di posishon a bai poko trankil. 17 hende muhé riba lista i tambe hende ku a bin di afó pa bai riba lista. Nos a bin pa krea lider nobo, p’esei nos tei, kargá pa lidernan hóben i nobo. Poulatamente nos ta bai informá pueblo di e lista di MPB,” Tjin Asjoe a bisa despues di a entregá lista di partido pa elekshon di mart binidero.

Lista di Suzy Thodé ta na laman



Lista di Suzy Thodé, Union Revolushonario Boneriano (URB), tambe ta na laman. Foto ta mustra Suzy Thodé na Passangrahan ayera na momentu di entrega di su lista. Entrega di su lista no a bai ku masha fanfaria, manera tabata e kaso ku otro partidonan. Lista di (URB) 1 Thodé, 2 Frans, 3 Bernabela, 4 Juana, 5 Comenencia, 6 Bart, 7 Jansen, 8 Jozephia, 9 Alberto, 10 Cijntje, 11 Carty, 12 Alders, 13 Wiel.

Ramonsito Booi:

“No ta hulandesnan so tin kos di bisa”

KRALENDIJK -- Union Patriótiko Boneriano (UPB) tambe a presentá su lidernan riba lista djamungu anochi. James Kroon a bisa e anochi: “Despues di hopi preparashon, nos ta presentá e kandidatanan riba lista i nos ta kla pa eleksion binidero 15 di mart. Kandidatanan tei. No tabata fásil pa yega na nan. Mi ta kontentu ku hopi hóben, nan mes a aserká pa hasi nos partido grandi. Nos ke ta e partido grandi bèk. Nos ke hasi e kosnan manera ántes. Nos di partido a para stabil den un koalishon. Pero nos a mira ku hopi kos no a bai manera nos tabata

deseá pa e hende.”

Dia 15 di mart, segun Kroon, nos mester ta e partido mas grandi na Boneiru. Poko poko pero sigur, nos lo tin ku pasa kosnan pa e hóbenan. Awor boso ta mira ku nos partido tin futuro. Hopi kos a pasa ku Ramonsito Booi, Burney Elhage, pero nos a sigui kere den partido. Huntu ku Maritsa Silberie, Booi, nos a kana pa yega na hende pa lista. Masha danki na Booi pa e sosten. Te a kuminsá ku e Boneiru di awe, parti di Hulanda. P’esei no tin un hende mas mihó pa yuda ku e partido. Nos mester di un patriótiko fuerte. Nos

ta sigui kana e kaminda pa yega na 15 di mart.

Booi: “Mi ta masha kontentu ku loke Kroon a logra, pone un tim manera esaki. Nos a traha un struktura pa mustra unda nos ta bai. UPB ta grandi i semper a logra. Ban pa 5 asiento, pa UPB guia Boneiru bèk, stòp ku e kos di loke tin awor. Ban pone Boneiru riba e kaminda ku e mester ta. Nos hendenan a bin kas

bèk.” Na final Booi a presentá e kandidatonan, entre otro Benito Dirksz. “Benito tei i e ta bèk na kas. Nos tin hendenan ku tabata den kantor di otro koló, awor ta bèk serka nos. Kiri Thodé a representá Boneiru afó, awor e ta bai hasié na Boneiru. Nos tin Wimpi Cici-lia, no pa duna partido mas voto, pero e tin un trabou importante ku mester finalisá. Nos tin un lista pa gana

eleksion pa un mihó pa Boneiru. For di 15 di mart ta bai kaba ku e kuenta di ken ku ta hasi kiko ku ta, òf ta sinta i no sa kiko mester papia ku e hulandesnan. E motibunan ku mi ta aki, ta pa duna nos bonerianonan bèk nan derecho.”

E lema di partido bèrdè ta: ‘Un Boneiru fuerte den balansa. No ta hulandesnan so tin kos di bisa. Nos tambe tin’.



The Frans Paradise a partisipá na show di boto

KRALENDIJK – Tabata un gran eksperensia pa Taty Frans di The Frans Paradise pa partisipá na e shou di boto na Düsseldorf, Alemania. “Ta importante pa konektá ku spònser, amigu, algun fanátiko eksitá, kontentu di wak mi i konstruí un mihó konekshon pa mi sentro di windsurf,” Frans ta skirbi.

Sinti bon pa ta riba stage durante e freestyle di wind-

surf di seshon den pisina.

Ta un show grandi i pa Frans ta un honor di por tabata presente na e evento grandi akí di deporte akuátiko.

Frans: “Kanando mi a pasa na e stènt di Tourism Corporation Bonaire i Buddy Dive Resort Bonaire, bon promoshon i nan ta hasiendo un gran trabou promoviendo Boneiru.”



Van Huffelen a djòin 'Ride for di Roses'

KRALENDIJK -- Boneiru por mira bèk riba un eksitoso edishon di 'Ride for the Roses' ku a tuma lugá riba djadumingu.

Un grupo grandi di partisipante a reuní promé ku solo a lanta, pa kuminsá

kana ku subida di solo, komo kontribushon na e lucha kontra di kanser.

Remarkabel e aña akí tabata presensia di Sekretario di Estado, Alexandra van Huffelen, kende huntu ku representante remplasante

di Reino, Jan Helmond, a partisipá den e aktivitat.

Ámbos partisipante i e komité di organisashon tabata hopi satisfecho ku e manera kon tur kos a kana.



KÒRSOU

Kurso di digitalisashon a start

WILLEMSTAD – Ministerio di Enseñansa, Siensia, Kultura i Deporte (ESKD) a organisá kurso di digitalisashon huntu ku Ministerio di Gobernashon, Planifikashon i Servisio na Públiko (BPD) pa personal di sostén di IT di tur direktiva di skol. Esaki den kuadro di e trayekto di digitalisashon den enseñansa pa hasi uzo di Mi-

crosoft 365. E kurso a keda tené na e skol sekundario di direktiva di skolnan katóliko Frater Aurelio SBO. E kompania APS-IT Diensten a duna e kurso i ta sigui traha huntu ku e tim di digitalisashon di Ministerio di Enseñansa, Siensia, Kultura i Deporte pa profeshonalisá e ministerio den e área di digitalisashon. Durante di e aña aki e trayekto aki ta bai

konosé un dimenshon nobo kaminda ta bai duna mas kurso i treinen na personal

di Ministerio di ESKD tambe. Esaki ta sigui durante di e periodo aki pa asina traha

mas dirigí i efisiente riba e trayekto di digitalisashon den Enseñansa.



Miss Universe Gabriëla dos Santos a bishitá Parlamento di Kòrsou.

WILLEMSTAD -- Djaweps 26 di yanüari 2023, Gabriëla dos Santos, su mayornan i sra. Aysjel Maria Direktor di Curaçao Beauty Pageant Committee a hasi un bishita na Parlamento di Kòrsou. Durante e enkuentro presidente di Parlamento sra. Charetti America-Francisca i vários

miembro di Parlamento a dirigí palabra di gratitut na sra. Dos Santos, pa su presentashon na miss Universe, kaminda ku Gabriëla a sali den e tòp 5 di mundu. Parlamento di Kòrsou, na nòmber di pueblo di Kòrsou a felisitá i gradisí srta. Gabriëla dos Santos.



Knops ta bandoná Tweede Kamer

DEN HAAG – Polítiko Raymond Knops di CDA, ta bandoná Tweede Kamer. E eks minister i anterior Sekretario di Estado, ta pasa pa e fundashon Nederlandse Industrie voor Defensie en Veiligheid (NIDV). E ta bira presidente di e fundashon. Esaki fuentenan a informá De Telegraaf.

Knops tin un base militar, algu ku ta kuadra ku su

funshon nobo na NIDV. El a hasi edukashon di ofisial na Koninklijke Militaire Academie na Breda i a traha komo ofisial di fishi na forsa aéreo. Mas biá Knops tabata den Tweede Kamer na nòmber di CDA. Ei nan e tabatin e portafolio di defensa bou di su enkargo. Komo mandatario di asuntunan anterior, e mester a atendé diferente asunto di is-

lanan Karibe Hulandes debí na reformashon. Knops ta sali promé ku su término terminá. Den e gabinete anterior e tabata Sekretario di Estado pa Asuntunan Interior i Relashon di Reino. Despues el a bira Minister na e ministerio. Esei a sosodé tempu ku Kajsa Ollongren di D66 temporalmente a hala tras debí na problemanan di salú.



Eksploshon dilanti porta di Supperclub

AMSTERDAM – Djaluna mèrdia tabatin un eksploshon dilanti porta

di Supperclub na Singel den Amsterdam. Esaki e stashon di Amsterdam AT5

ta informá. E tim di eksplorashon di eksploso, TEV, ta hasien-

do investigashon i a sera e área. Kiko ta orígen di eksploshon na e lokalidat di evento, ainda no ta konosí. Polis ta hasiendo investigashon.

Segun e bosero di polis, a sende un vürwèrk pisá. Tambe a haña djùk dilanti e porta. Lo no tabatin líkido flamabel den nan i ta investigando ku esakinan tabatin algu di aber ku e eksplo-

shon. E eksploshon a kousa daño na e bentananan, pero te asina leu no tabatin ningun persona ku a resultá heridá.

Testigunan a deklará na Parool ku por a tende un zonido enorme ku ta hopi mas duru di un bòm di vürwèrk. Trahadónan na un pakus djis serka tambe a tende e zonido.




Trùk ta kai for di viadukto riba bús di entrega

GORINCHEM – Riba A15 na Gorinchem, djalu-na mainta un trùk di karga a kai for di un viadukto i a

bai resultá riba un bús di entrega.

Tantu e shofùr di e trùk di karga komo esun di e

bús di entrega, mes por a sali for dor di e vehíkulo. A transportá nan ku leshon leve pa hospital.



Duana ta interceptá 9 mion sigaria ilegal

HEERLEN – Durante un kontròl djaweps banda di A76 den besindario di Heerlen na Limburg, Duana e interceptá mas di 9 mion sigaria ilegal den un trùk di karga.

Durante un kontròl, duaneronan a deskubrí ku e kargamentu di e trùk no tabata kuadra ku loke tabatin riba e lista di karga.

Un 'kachó di tabako' seguidamente a deskubrí e sigarianan.

Duana ta sospechá ku e sigarianan tabata destiná pa merkado ingles. Sí a bende e kargamentu riba merkado hulandes, segun Duana, Gobièrnu lo a pèrdè 2,2 mion euro na akseins. Lo destruí e sigarianan.



STATIA/SABA/ST. MAARTEN

Treinen teknologia SMART pa adulto mayó

PHILIPSBURG – Minister di Salubridat Públiko, Desaroyo Sosial i Labor, Omar Ottley, a bishitá Gaston Boasman Community Helpdesk pa adulto mayó i personanan desabilitá na Hope Estate, durante nan treinen di teknologia SMART.

Ta imposibel pa sobrebibi den e mundu moderno sin e abilitat pa utilisá un aparato elektróniko manera kòmputer, laptop, tablet, òf smartphone.

Pa sigurá ku e adultonan mayó no ta keda tras, Minister Ottley, pa medio di Departamento di Desaroyo di Komunitat, Famia i Asuntunan Humanitario, un divishon di Ministerio di Salubridat

Públiko, Desaroyo Sosial i Labor, a tene un treinen di teknologia SMART pa adulto mayó.

Na 2022, Departamento di Desaroyo di Komunitat, famia i Asuntunan Humanitario, a evaluá un total di kuater organisashon di adulto mayó. Meta di e evaluashon ta pa evaluá e status aktual di e organisashonnan i kisas determiná kon por asistí e organisashonnan akí.

E treinen di teknologia SMART di tres luna ta un di e kantidat di proyekto ku ta kuadra ku e evaluashon. E tópikonan di e treinen di teknologia SMART ta inklui, krea dokumento ku imágen, buska riba web riba diferente programa,

sèt alarma riba telefòn pa afspraak, usa Whatsapp pa mantené kontakto ku amigu i famia, tantu lokal komo pafó, ect.

Partisipantenan na e treinen di teknologia SMART a ekspresá nan satisfakshon pa e loke nan a

siña te asina leu. Caribbean Institute For Social Education Foundation (CIFSEF) a fasilitá e treinen.

Dos biá pa siman e adultonan mayó a atendé e treinen. Durante e seshonnan, tabatin dos fasilitadó presente. Un segundo grupo

di partisipante lo kuminsá klasnan e segundo kuartal.

“E treinen di teknologia SMART ta un oportunidat ekselente pa kambio i mehorá e kalidat di bida di e adultonan mayó i minimalisá limitashonnan físiko,” Minister Ottley a bisa.



E persona di mas edat di St. Maarten

Selebrashon 104 aña di Carmen Carrington

PHILIPSBURG -- Carmen Carrington, mama, tia, wela, wela grandi, a selebrá su kumpleaño hunto ku famia, amigu, famia di iglesia i bisiña, inklui Su Ekselensia Gobernador di St. Maarten Ajamu Baly, Promé Minister Silveria Jacobs i Minister di ECYS, Rodolphe Samuel. Carmen a kumpli 104 aña i ta e habitante di mas edat di St. Maarten.

“Ta un honor i plaser ta

por ta aki presente na nòmber di Gobièrnu i e hende di St. Maarten, pa selebrá e honor di bida largu di Carmen Carrington, den su barío ku ta kuid’é tur dia di nobo. Mi ta sita un pasashi den Beibel, Job 12.12: ‘Sabiduria ta pertenesé na e edat i ta komprondé na e grandi’, rekordando nos di e balor di papia ku adultonan mayó,” Promé Minister Jacobs a bisa.

Pa Promé Minister Ja-

cobs ta imperativo pa sigurá ku e hubentut tambe meskos ku nos grandinan, ta haña hopi oportunidat pa sinta, papia i kompartí eksperensia.

Promé Minister Jacobs a bisa ku e grasia, amor, goso i akitut positivo di Carrington, lo kontinuá pa

inspirá tur e generashonnan bou di dje pa ta dispuesto pa biba un bida largu i produktivo na mundu, specialmente St. Maarten.

Durante e selebrashon na kas di Carrington, Gobernador di St. Maarten, Ajamu Baly, a kompartí kòrtamentu di bolo huntu

ku su yu, Iona Stuart, Promé Minister Jacobs i Minister di Kultura, Edukashon di Deporte, Samuel.

Na nòmber di Gobièrnu di e hende di St. Maarten, nos ta felisitá Carrington ku su 104 aña ku hopi bendishon pa salú i vitalidat.



Decision di Corte a cay

Acusacion contra dentista mal hinca den otro y declara liber

ORANJESTAD -- Diabierna mainta Corte a dicta sentencia den e caso penal contra e dentista Venezolano Antonieta del Carmen Morales Soto. E decision di Corte ta indica cu e citacion no tabata cuadra cu loke ley ta describi di e violacionnan cu autoridadnan di salud ta bisa cu el a comete. Na final, a hay'e culpabel di solamente violacion di un ley y no di un crimen. Pa esaki no tin castigo di

prizon.

E dentista / ortodontista Venezolano biba na Aruba a cuminsa un practica sin cu e tabatin e permisionan necesario. E ta casa cu un Arubiano y tin dos yiu. Diabierna mainta tabatin sentencia den e caso aki despues cu e tratamento a tuma luga dos siman pasa. A detene e señora aki despues di dos melding cu e ta atendiendo cliente sin cu e tin e papelnan necesario.

E ta un graduado di Universidad di Zulia y a entrega su papelnan aki na Aruba pa e por haci su practica.

Sinembargo te cu tratamiento di su caso den Corte, e no a haya contesta. Den Corte el a bisa cu e no tabata haci propaganda y nada. Ta hendenan cu e conoce e tabata yuda y su clientenan mes e tabata bula bay Colombia pa atende nan. Y ora cu e no por, nan ta bini Aruba pa e mira nan.

Pero a resulta cu aki e no por haci nada sin permiso di Salubridad Publico. P'esey nan a acus'e cu entre Maart 2019 y 6 November 2020, e tabata traha como dentista y otodontista ilegal na Aruba.

Tambe ta acus'e di tabata traha di un forma no higienico y tabata duna pashentnan remedinan sin cu e ta autorisa pa haci esaki.

Fiscal a conclui cu e ta culpabel y a exige multa to-

tal di 6 mil florin of 10 dia cera pero tambe un castigo di prizon di 18 luna di cual 8 luna ta condicional cu un tempo di prueba di 5 aña. Hues den e sentencia diabierna mainta a splica cu e mester declara e acusacionnan.

No tin suficiente prueba legal pa bay di acuerdo cu e demanda di fiscal pa declar'e culpabel.

Varios detencion y asistencia di polis na final di e evento di Boatfest

ORANJESTAD -- Di asabra den oranan di atardi pa anochi na final di e evento Boatfest polis na varios ocasion mester a bay na Nikky Beach. Un homber bou influencia lo a cay den

loma y a guli hopi awa, mesora esnan na e sitio a bati alarma. Ambulance a presenta y despues cu e paramediconan a trat'e, a transport'e pa hospital. Durante final di e evento a sur-

gi varios pelea cu tiramento di botter, aki tambe polis mester a asisti, na e sitio polis a detene tres persona y tur tres a wordo transporta cu transportwagen pa Warda di polis na playa.

Tambe a bay eyan despues di e evento pa motibo di molester di musica duro riba e botonan cu tabata mara na Nikky Beach. Durante dia si e evento mes a bay hopi trankil, un cantidad grandi di boto, yate etc. tabata mara na Nikky Beach. Maske awasero a causa molester asina mes e evento di Boatfest durante dia tabata bon bishita.



Homber di edad maltrata na Cas Paloma

ORANJESTAD -- Di asabra anochi den careda di 10:30 un persona lo a wordo maltrata na Cas Paloma cu algo. Mesora patrulla di Santa Cruz a sali direccion e adres. Na nan yegada a constata cu berdaderamente un cabayero di edad lo a haya confrontacion cu un otro homber y esaki lo a dal e cu un palo.

Ambulance mientrastanto ya tawata na caminda.

Na yegada despues di un rato e persona herida cu ayudo a sali y subi e brancard. E la wordo hiba Hospital pa tratamiento.

Despues cu polis a tuma dato na e adres nan a sali bay un poco mas pariba na un otro cas, eyan tawata tin hende pafu para. Eynan a detene un homber sospecha di a comete e maltrato. Transportwagen a wordo pidi unda e la wordo hiba Sta.Cruz.



ARUBA

Exitoso Parada di Blaas na San Nicolas



Chauffeur bou influencia ta ocasiona accidente

ORANJESTAD -- Di-
asabra den careda di 6'or y
mey di atardi presencia di
polis y ambulance a wordo
pidi pa un accidente cu un
persona herida y hopi daño


material.

E accidente a sosode
na Papilon na e T-kruising
banda di Cede di MEP.

Un Pickup Chevro-
let S10 biniendo di pabou

a subi caminda sin duna
pre-ferencia na un Honda
Civic cu tabata biniendo
di pa nort riba e caminda
di preferencia. Den e im-
pacto fuerte ambos auto a
haya hopi daño material y e
chauffeur di e Honda Civic
a keda herida, e tabata keha
di dolor den pecho. Ambu-
lance a yega na e sitio pa
trata e chauffeur di e Honda
na e sitio.

Na yegada, polis a bin
ripara cu e chauffeur di e
pickup ta bou influencia,
mesora e la wordo deteni y
transporta pa warda di po-
lis.



Miembro di Coast Guard a cay y herida su cabes den Hot Zone

ORANJESTAD -- Di-
asabra anochi den careda
di 11'or polis s bay un
establecimiento den Hot
Xone, unda cu un turista
a cay y herida su cabes.
Na yegada di polis me-
sora a pidi pa un am-
bulance, mirando cu e
herida cu ta na cabes di
cabayero turista ta basta
serio.

E cabayero cu ta
miembro di e boto Ken-

nedy cu ta Coast Guard
a bisa polisnan cu ariba
e boto mes e lo busca of
ricibi asistencia medico,
mirando cu nan tin tur
cos ey riba.

Polisnan uzando trans-
portwagen a hiba e cu su
amigo te na boto pa asina
e ricibi e asistencia medi-
co cu e mester.

Por a mir'e baha cu
man wantando su cabes.



Pa sigui kurso empayer mas avansá

Preparashon kanando bon pa empayer Clayson Cicilia biaha pa Merka

KRALENDIJK--Empayer Clayson Cicilia ku ta preparando pa huntu ku Giovanni Meulens, sigui kurso mas avansá di empayer na Merka, den un entrevista ku nos tabatin kuné, a bisa ku tur kos ta kanando bon ku e preparashonnan pa e por biaha i kursonan ku e lo tin di sigui aya na Merka próksimamente.

E preparashonnan ta

hopi leu pa loke ta su biahe i tambe e otro partinan di e kurso ku tin ku sigui. Clayson huntu ku Meulens lo biaha di 3 pa 13 di mart pa Merka. Esei ta e promé kurso ku e ta bai na Merka.

Tin un di dos kurso pero ta wardando konfirmashon pa ku esaki, pa ku e fechanan eksakto di e kurso i tambe di e biahe. Empayer señor Giovanni

Meulens a atendé ku e partinan di e kursonan na Merka, Clayson ta atendé te na e momentunan aki ainda ku e parti pa kompletá e fondonan nesesario pa realisá e biahenan.

Aworakí ta atendiendo ku e promé “fundraising” ku ta un BBQ ku lo tuma lugá otro siman djadumingu ku ta dia 5 di febrüari 2023. Lo bai tin un di dos

fundraising pa kua Claysona bisa, ku momentu ku e regresá di e promé kurso, e lo bai organisá un “fundraising” mas pa yega na tur e fondonan nesesario pa logra realisá e biahe pa Merka pa e promé kurso.

Ta pidi komunidad boneriano pa tuma kontakto ku Clayson mes na 782 0603 pa kumpra nan karchi di barbekü i asina koperá

ku Clayson pa e promé fundraising pa e por biahe pa sigui e promé kurso aya na Merka.

Tambe por pasa serka mama di Clayson durante dia na Flamboyan Lottery pa buska nan karchi BBQ i koperá ku Clayson pa e logra e biahe i sigui parti di e kurso avansá di empayer aya na Merka.

Deportivo 4-3 riba Champs

KRALENDIJK--E ekipo di futbòl veterano 50+ di Deportivo, djasabra último den kontinuashon di e weganan di futbòl veterano di tur fin di siman, a gana di FC Champs 50+ ku skor di 4-3.

FC Champs den e partido djasabra último a kai vensí pues ku e skor di 4-3 kontra Deportivo, despues ku basta dia e ekipo aki di

FC Champs no a pèrdè un partido.

Pa loke ta e golnan di e partido djasabra último, e golnan di Deportivo ta di Kerrel Alberto i Patun Saragoza ku a hinka 2 gol kada unu.

E golnan di FC Champs den e partido aki ta di Ròy Kort ku a hinka 2 gol, Sherwin Craane a hinka 1 gol den e partido.

E partido aki a tuma lugá na Fèlt Elion Flores na Amboina 5'or atardi.

Despues di e partido aki FC Champs ta tuma un pouze te ku despues di karnaval. Pobablemente nan promé partido despues di karnaval lo ta kontra La Fama 50+ di Rincon pa 5'or atardi na Fèlt Elion Flores na Amboina dia 25 di febrüari 2023.

The Untouchable vs Azteca

KRALENDIJK--Kampionato di biliart bola-8 di nos isla ta sigui e siman aki, pa ta mas eksakto awe djamar 31 yanüari 2023 pa mitar di ocho anochi, esaki den sala di biliart di Kompleho Deportivo Jorge Nicolaas na Kaya Amsterdam.

Mañan anochi pues pa mitar di ocho, wega lo ta

kayente den sala di biliart di Kompleho Deportivo Jorge Nicolaas, ora ku e ekiponan The Untouchable di Antriòl Pariba i Azteca di Nort Saña enfrentá otro pa di tres biá den e kampionato. E partido aki ta primintí di bira otro tremendo partido di e kampionato di biliart bola-8 di nos isla.

Segun empayer Giovanni Meulens

Clayson Cicilia bon prepará

KRALENDIJK--Nos a papia tambe ku Empayer Meulens ku ta hibando empayer Clayson Cicilia Merka pa kursonan avansá di empayer aya na Merka.

Giovanni Meulens riba nos pregunta den entrevista siman pasá, a duna di konosé ku tur kos ta kanando manera nan a plania i manera nan ke, ku e preparashonnan di Clayson i su persona pa e kurso di empayer mas avansá aya na Merka.

Nan ta sali pa Virginia 3 di mart i ta regresá dia 13 di mart 2023. Tambe empayer

Giovanni Meulens a hasi posibel pa Clayson por bai e kurso tambe di MLB. Anke ku e la papia ku nan apart, e sa tambe ku esei ta positivo i e la inskribí Clayson na e kurso aki tambe kaba.

Dia 20 di aprel 2023 nan ta sali pa e kurso di MLB.

Tambe segun empayer Meulens mas aleu riba nos pregunta, a bisa ku tin mas ampayer di otro islanan ta hasi e biahe pa Merka pa e kurso mas avansá.

Di Kòrsou tin unu ku lo bai. Esunnan den Karibe tambe segun e infor-

mashonnan, tin problema pa haña Visa pa por biaha pa Virginia pa e kurso.

Den Karibe tambe tin mas ta bai pa e kurso pero nan ta bai topa ku esunnan di Merka mes, segun empayer Meulens a bisa den entrevista kuné siman pasá.

Pa loke ta trata Clayson e no tin problema ku Visa, e ta riba bon kaminda.

E tin 90% tambe ku e ta logra bai e kurso di MLB tambe.

Pa e biahe pa Virginia ta tratando na e momentunan aki pa nan biaha huntu

pa Virginia. E ta wardando Clayson keda kla pa e por regla su ticket, pa e haña mesun buelonan ku Clayson pa nan biaha huntu.

Empayer Meulens ta hasi un yamada na pueblo boneriano, pa ban saka un man i koperá ku empayer Clayson Cicilia pa e logra realisá e biaha pa bai e kurso.

E tin hopi gana, hopi deseo pa bai e kurso, loke ta dun'é sin duda e garantia ku e lo logra sigur pa e kurso aki pa empayer mas avansá.

Ban koperá pues ku empayer Clayson ku ta e promé hóben si nos no ta kiboká, ku ta haña e oportunidat aki pa sigui kurso mas avansá di empayer pa despues sigui mas leu tambe komo empayer di beisbòl.

Di nos parti un bia mas e yamada na komunidad boneriano, pa ban koperá ku empayer Clayson pa e logra esaki.

Saka un man yuda Clayson pasó e ta bai logra esaki.

DEPORTE

Eksitoso tryout fin di siman

Un dia mas tryout The Dreamers djáraseon

KRALENDIJK--Fin di siman pasá, pa ta mas eksakto djasabra i dja-dumingu último 28 i 29 di yanüari 2023, The Dreamers Baseball & Softball Federation, tabatin su promé fin di siman di “tryout” pa muchanan ku a deseá di bira miebro di e federashon. Esaki tabata un gran éksito.

Debí na e gran éksito di esaki fin di siman pasá, a disidí na bini ku un dia mas di tryout djáraseon awó. Mirando ku tin mas mucha ku no a logra haña oportunidat di inskribí nan mes, e

federashon a bini ku un dia mas di inskripsion pa duna oportunidat na esnan ku no a logra haña oportunidat pa inskribí nan mes, pa hasi esaki djáraseon awó 1 febrüari 2023 na Amas Ballpark na Tera Kòrá. Esaki ta di 6'or pa 8'or anochi pa mucha di 4 aña te na adulto di 20 aña.

Por inskribí pa tantu beisbòl komo sòftbòl, mucha muhé i mucha hòmber. Pa inskribí e mayornan tambe mester ta presente ku e yu(nan) pa por hasi esaki.

Riba potrèntan algun bista di e tryout fin di siman pasá.



Ku United Girls na kabes

Futbòl di dama ta sigui djaweps

KRALENDIJK -Kampionato futbòl Open Class femenino o sea di damas, ta sigui e siman aki ku su di dos buèlta di e kampionato.

E promé wega di e buèlta aki ta e wega ku a keda tras, e wega ku a para aña pasá pa motibu di koriente ku a kai afó.

E kampionato ta sigui e siman aki pues riba djaweps 2 di febrüari 2023.

Riba e dia aki lo hunga kontra otro e ekiponan ATC di Tera Kòrá i SV

Vespo di Rincon.

E partido aki ta tuma lugá 8or anochi na Fèlt ATC na Tera Kòrá.

Posishon ekiponan.

FFB a publiká tambe e posishon di e tres ekiponan ku ta den e kampionato ku United Girls di Nikiboko na kabes ku 9 punto proseguinte di 3 partido ganá den e kampionato.

Posishon ekiponan.

United Girls 4 partido hungá, 3 ganá 0 empatá 1 pèrdí, 9 punto.

Atlético Tera Cora 3 partido hungá, 1 ganá 1 empatá 1 pèrdí 4 punto.

Red Diamonds 3 partido hungá, 0 ganá 1 empatá 2 pèrdí, 1 punto.

Un invitashon ta bai na e fanatikada di e deporte rei futbòl, den e kaso aki kontinuashon di kampionato femenino o sea di damas, ora ku djaweps awó e ekiponan ATC di Tera Kòrá i Vespo di Rincon.

Aktris di *The Tale Of The Tails*

Blanca Blanco ta show ku bikini riba bich na Boneiru

KRALENDIJK – Aktris Blanca Blanco a show ku bikini riba bich na Boneiru. Riba e fotonan por mir'e ta eksponé su kurpa den bikini i tur kos ta indiká ku e tabata gosando miéntras e tabata riba e isla.

E aktris di *The Tale Of Tails*, kende por a mira últimamente den *Beverly Hills* promé ku Pasku, a pone un dozein di foto ku el a saka mayoria den bikini momentu ku e tabata tumando temperatura tropikal di Boneiru.

Parse ku e aktris tabata hasiendo un oudishon pa e portada di *Sports Illustrated Swimsuit Edition*, momentu ku e tabata pose riba santu. E estrea tabata bistí ku dos parti di bikini ku tabata muestra su pianan fuerte danki na e seshonnan di ehersisio na Los Angeles. Blanca Blanco ta un aktris merikano kende a nase i lanta na Watsonville, California, huntu ku dos ruman

muhé i dos ruman hòmber, di mayornan imigrante mèksikano kendenan a traha diferente tipo di trabou pa aportá nan. Na edat di nueve aña, su famia a muda pa Chelan, Washington, kaminda el a kuminsá sigui klasnan di aktua, kanta i organisá presentashon di teater entre su estudio.

Despues di skol sekundario, Blanca a gradua na Washington State University ku bachelor di siensia den sikologia ku un master di trabou sosial. Despues el a establese na Los Angeles pa un karera den aktuashon. Ei nan el a trein bou di direktor Gordon Hunt, ganadó di DGA Award, ku kua kompania di teater el a presentá den diferente produkshon.

Su promé ròl mayó tabata na 2008 den *Dark Reel*. Tambe el a aktua den entre otro *Anatomy of Deception* (2014), *Crimes of the Mind* (2014), *Defend-*

ing Santa (2013) (ION), i *6 Children & 1 Grandfather* (2018) i *Mission Possible* (2018). Teen Star Academy (2017),

Na 2018 Blanca a kuminsá filma e pelíkula *The Dog of Christmas* (2021).



CHANGAN WORKFORCE

3 YEAR WARRANTY

M201 SEVEN SEATER



\$13,995

M401 ELEVEN SEATER



\$17,995

MS201 DOUBLE CABIN



\$16,995

M401 CARGO



\$14,995

MD201 FLAT BED



\$12,995

M201 CARGO



\$11,995

MD201 COOLING BOX



\$17,995

3 ANNIVERSARY
CHANGAN
ON BONAIRE

dabboussi
motors

f /dabboussimotors

786.6662